

**IZESU' ZUHO EHESO EBEKU'  
MINANI' NETI LUHUVO NITE'  
PAULO' GIZE-NGIDINE'  
Izesu' Evenele Zuho Eheso  
Ebeku' Minani' Neti Luhuvo  
Nite' Paulo' Gize-ngidine'  
Ne'mi Gomu' Gataa' Gamazi  
Ve**

Mene Luhuvo nite' nene aposolo' Paulo' gizine'. Ei' monovo danava've nene Aposolo bukoo' gize neive. Ido' Izesu' Kilisito' evenele zuho Loma ebeku' minani' neti luhuvo nite' Paulo' gize-ngidingumu' gomu' gataa' gamazi gizuningukisi nene ei' Paulo' monovo'vemu' nene ma gatelesane. Paulo' luhuvo nite' mene gizine' nene Loma vete gizebo ani' polovinisi Asia ve langu' Eheso ebe' minine' misubola Izesu' evenele zuho mini'mi monangumu' gize-ngidine' ve.

Asia polovini'siu' minani' ebe' mukikuti' Eheso ebe' ne'mo naba o minine'. A'mine siti nene n'Giliki alevelite gana' api' igi di soto' ikeni' neine'za Loma ve nete a'mine' sitilo' nene gamene ha'nalo' gehepeve gizebo ani' ve. Ido' a'mingu' nene evene' zuho ato ato' mukikutikisi ido' Zuda ve mukikisi minani' ve. Zuda ve minamave nete soza o'moso mono' li-ngimaa' ani' ve. Eheso aleveliti o'moso'ine gihile minine' ne'mi gulive nene Alateme' ve lo minine'. Eheso numuno ebeku' nene ei' mono' numu've naba

gizi-dikevo minine' ve. A'mine mono' numuno nabau' nene a'mine o'moso vene' ne'mi avazaha mumuno've nene Okulumokuti' do'mozine' ve li di otikani'. A'mine avazaha nite' nene ami've vaikisi minine' vene' gele minine' ve. A'mine gahevela kanitili muki' minanguti' nene evene' ingine Eheso ebeta a'mine soza o'moso vene' nene mono' li-imilisa vaa' ani' ve.

Paulo' aza Izesu' Kilisito'nimu' evene' lo-ngemelesa monine' gamenela nene a'mine Eheso numuno ebetasi vo lo-ngemaa' ine'. A'mine Eheso numuda vo ninge-ngedelesa gamene ma vingu' nene kilisimasi setohamo ivile' ivo minine'. A'minemu' nene aposolo laka'ni 18,19 ido' 20 neu' nene gatelesane. Alinge' nene Izesu'nido' gili ele'vole' ilizave lo evene' lo-ngimingumu' Loma ve nete nala' numungu' huli-dani'.

Mene luhuvo nite' nene Paulo' aza a'mine nala' numungu' minine' gamenela Eheso ebeku' Izesu' evenele' zuho minani' nene gizo hulo-ngidine'. Gizo hulo-ngidine' gamenela nene Kolosa ebeku' Izesu' evenele' zuho minani' nesi gizo hulo-ngedo ido' a'mine Kolosa ebeku' minive ado' gulive Hilemoni'ni nesi gizo hulo-dine' ve. Eheso aleve gizo hulo-ngidingu' line' gamazi linge mukita nene Kolosa aleve gizo hulo-ngidine' nesi hamoli'mine o neive. Paulo'ni hize ele' i-daa' aveuti' Tikiko' ne'mo a'mine luhuvo nite' setohamo nene do vo Paulo' gize-ngidive ngimine'.

A'mine Eheso aleve luhuvo nite' gize-ngidingu' nene aza ne'mine initekumu' gizuve lo ma lamine' ve. Ne neiha O'moso'mo gozopotati' ne'mine olove lo lokido' nene idise api' ogo noe'metive. Ado' Izesu' Kilisito' aza

Okulumokuko nizani' initekisi ido' misubouko nizani' initekisi nene do hamo' molo naba'ine minelive lo lokido' nene noe'metive lo a'mine luhuvo nite'veu' nene gizine' ve. A'mido' imine' molo ti' lo gizine': A'mine gozopotati' olosa gala gele minine' initekuti' ma nene ei' lulo emekine' gipele Izesu' Kilisito' gono dadoti' nene ei' izipahala zuho minilizave lo leli' lele'mize molani' ne neive. O'moso'mo lihimete gilito do hulo-ledo do ei' izipahala lolo' o-ledelive lo Izesu' aza lelito' medelo mino malipo zalo' hiline'. Izesu' Kilisito'nido' gele ele'vole' une' gameneloti' nene ei' evenele zuho nizave lo ei' Sikalahu've netunu' nene do soto' ogo lehize-lidine' ve. O'moso aza ne'mine o-lidine' nene haza gehepeve meni've nomine' o-lidine' ve. O'moso'mo ne'mine o-lidine' nene laza inite' ma uningumu' o-lidine' nevoba asi eito' gele ele'vole' uningumu' ne'mine o-lidine' ve. Laza a'mido' inite' ma meni hize-delone' nomive. Ne'mine idi'mo Zuda ve minamani' aleve nete ezemu' gili ele'vole' i minani' Zuda vesi di hamo' igi hamo' zuho lili' igi ei' evenele zuholite dalizave lo lo huko-ngidine' inite' muki' dalizangumu' nene O'moso'mo aka'ine do ngolo' lo-ngidine' ve. Ne'mino Kilisito' malipo zalo' hiline' ne'mo Zuda vesi ido' Zuda ve minamavesi nene ge lovo o neme ne lovo o geme li minani' monovo'ine nene do hulavo gohi ne'mine ilizado' minamine'. A'mine mulise gosoho' ado' eze evenele zuho do bize-ngidine' mene Okulumokuko guve'inesi ve naba minanikisi ido' numudo' namado' minanikisi ingine mukito' ne'mine idoti' nene ei' amuzo'vesi ido' gala gele nge laa' neine'

monovo'vesi nene ningi gililizave lo do bize-  
ngidine' ve.

A'mine gamazi mene gize osu' lo neloti'  
imine' molo ti' lo line': O'moso'mo inite'  
naba ne'mine o-ngidine' nenako nemu' nene  
a'mine Zuda ve minamani' aleve ingine engi'  
monovo golosolo' e'meti minaa' adoti' nene  
hulilizado' o neive. A'mine monovo goloso  
nene ne'mino neive: Soza laa' ido' evene'  
mamu' lizebolo' molaa' ido' gumine oga' ido'  
lolize gamazi laa' ido' gipe alu vene' vemoho'  
gopo' napa ingi'mi monaa' nani' ido' initekumu'  
gililinga laa' ido' noso no sipaki oga' nevo'mine  
monovo nene hulilizave. Ne'mine monovo  
ami monovo ato' ma ilizani' monovo nene  
ado' evene' monovo lamine' i-ngimi lihime nii-  
ngidavo ma ingine lihime'ine di minami huli-  
ngidii hize ele' o-ngedeline' gamazivo' lilizave.  
Ne'mine oga' monovouti' ma nene do bizo mino  
makato' O'moso gulive do hozi lo nama laa'  
ne neive. Vene' ingine va'ninginemu' nene  
gizebo vete neive li gili gamazi'ine gili dalizave.  
Vemoho' ingine ele'ningine mulu'ine ngimii  
monovo lamine' i-ngimilizave. Izipe ingine  
gamene gamene ize'ninge me'ninge gamazilo'  
gili dalizave. Ize'ninge me'ninge ingine gamene  
gamene izipaha'ineliti lu'ine di goloso ami asi  
ingine naba igi minilizadaa evene' lamine'  
minilizangumu' ve li Guvelesi vemukisi ido' ei'  
monovo'vemukisi apizi ngimilizave. Gelekele'  
ve ingine gizebo ve'inelite liliza gamazilo' gili di  
mini gono amuzo mili di-ngidilizave. Gizebo ve  
ingine gelekele' izipe'ine nene monovo goloso i-

ngidamii asi monovo lisihekovo' i-ngidilizave.

Ido' ne'mine lo Paulo' ti' lo gizine': Ingene nene Guvelesi velati' amuzo dalizave line'. Ve goloso Satani aza ngemengu' molalosa aline' gamenela nene ngivile' amilingumu' nene ingine O'moso'mo ngeme neine' monovo lamine' tamine' muki' nene igi mili minilizave. A'mine ve goloso Satani ivile' ilizangumu' igi mili minilizani' monovo nene ado' gamazi lamine-tokovo' laa' ido' lisihe' lamine' minaa' ido' O'mososi evenekisi bizo maka' lamine' minaa' mi gamazi nene evene' li-ngimaa' ido' O'mosomu' gele ele'vole' oga' ido' O'moso'mo do ngu' izingumu' gili minaa' ido' O'moso'mo line' gamazilo' gili ele'vole' iga' ido' O'mosola laa' ne'mine monovo nene igi mili minilizave line'.

Gamazi gize osu' lolosa nene O'mosola eikumu' lilizave lo longo' o-ngedoo ido' Tikiko'ni nene gamazi lo-ngemelive lo noimiseluve lo longimine'. Ne'mine ogo luhuvo nite've nene no'noho' gamazitunu' gizo osu' line' ve.

*Paulo' Izesu' Kilisito' Evenele Geke' Lo-ngidine'*

<sup>1</sup> Izesu' Kilisito' aposolo've mineline lo O'moso'mo ei' lulolo' nele'mize molave Paulo' naza O'moso'mi zuho Eheso numuno ebeku' mini Izesu' Kilisito'nimu' gili ele'vole' igi e'meti minave lengi' nene luhuvo inite' mene nogizingiduze. Ningilo.

<sup>2</sup> Ido' meteho O'moso ido' Guvelesi ve Izesu' Kilisito' engitati' nasahili' ido' hongu lo lamino minaa' monovo nene lengita mine do voo miniliho.

*O'moso'mo Monovo Danava Lamine' Ato Ato'  
Lehize-lidine' Nemu' Siza Lo-do Do Naba O-  
deloningumu' Paulo' Lo-ngimine'*

<sup>3</sup> Kilisitoda ogo gi'mizuningumu' ve lo Guvetesi ve Izesu' Kilisito' ei' O'moso've mino melehosi minive aza nene Okulumokuti' lute hize ele' o-ledeline' monovo danava lamine' ato ato' muki' nene lehize-ledo no'noho' mo ize-lede neine' n-nako nemu' do naba o-do opo'ni lo-delone.

<sup>4</sup> Ne'mine o-lidine' nene gomu' olihe oku-lumo' misubo do soto' amosa neze ve'nelo' neze evene'ne lisihe' lihimetine nomivo gamazitine nomine' minilizave lo do kegese-ledo Kilisitoda do gi'mize-lidine' ve.

<sup>5</sup> Ne'mine ogo gomukuti' lulo lemo leli' nene Kilisito' gono dodo vilidoti' nene neni' izipaha'ne ve lo do ti' oloni' nene lamine' oloseive lo ei' lulolo' ogo do ti' o-lidine' ve.

<sup>6</sup> Ido' ne'mine ine' nene O'moso'mo lulo eme neive ei' gipele nene haza gidini leli' nasahili' o-ledo imiseline' nene O'moso aza atoli'mine ogo nasahili' gehepeve o-ledavo laza opo'ni lo do naba o-deloningumu' ve losa ne'mine ine' ve.

<sup>7</sup> A'mine O'moso'mo lulo imive gipele nene lelito' medelo leli' lihimetemu' vanise've hulo hiline' ne'mo a'mine lihimete nene hulo-ledavo lihimete nomine' minaa' none. Ee, ne'mine ogo aza vauve elo do atoli'mine ogo nasahili' o-ledo

<sup>8</sup> gele vevesaa' monovo ido' gele nge lo minaa' monovo nene lehize-lidine' ve.

<sup>9</sup> Ne'mine ogo ei' lulolo' gozopota Kilisito' gono dodo vilidoti' olove lo giline' inite' lamine' goloso suno' haleko ha minine' nene laza a'minemu' geledone' nene lamine' oloseive lo gelo a'mine suno' haleko ha minine' initekumu' nene lo soto'

ogo lo-limine' ve.

<sup>10</sup> A'mine ei' lulolo' do soto' iline' inite' nene ne'mino neive: Gono gizeka' hizo dodo vo neivo gamene lamine' nene soto' ogavo neu' nene api' ogo aza inite' mata' muki' okulumoku' minani' initekisi ido' me misubou' minani' initekisi nene mine lamine' igi minami ato ato' minadoti' do hamo' o-ngedo Kilisitoda do e'mete-ngedo Kilisito'ni nene a'mine inite' mata' mukiliti godo'nido' minive lolo' o-deleseive.

<sup>11-12</sup> Ido' laza ei' Kilisito'nimu' gele ele'vole' ogo minune' ne'mo gana' api' ogo Kilisito' do lu' izelingumu' nene gele ele'vole' ogo ezemu' gizebo ogo minaa' unive Zuda ve leze nene O'moso aza inite' muki' nene ei' gilidokovo' do soto' oga' ive aza gozopotati' ne'mine olove lo gala gelo minido' nene Zuda ve leli' nene do kegese-ledo ei' evenele zuho ve lo lele'mize molani' ve. Ee, evene' ato atolite ningi O'mosomu' eze nene emeni dameni've lamine' golososi neive li nopo'ni lilizave losa Zuda ve leze nene ei' evenele zuho ve lo lele'mize molavo none.

<sup>13</sup> Ido' a'mine'mine igi Zuda ve minamave lingine gamazi gihile ado' Kilisito' aza lengi' do lungu' izelingumu' gamazi lamine' nene mo gilisa Kilisito'nimu' gili ele'vole' ikevo ne'mo nene O'moso'mo lemelove lo lo huko line' Sikalahu've nene ei' Kilisito'nimu' ve lo lehizelengedo ei' ve lo a'mine Sikalahu' nedunu' nene noso molo-lengedavo nizave.

<sup>14</sup> Ido' O'moso'mo ei' Sikalahu've lehize-lidine' nene evene' muki' O'mosomu' nene emeni dameni laminekisi neive li nopo'ni lilizave lo

eze evenele leli' nene meni hizo do eita iline' gono api' ine' nene mudise do pelosa lemelesa salani molo-lidine' inite' linge ma nene mo lamineto' dalizave lo lelebizelesa a'mine salani molo-lidine' initekuti' ma a'mine Sikalahu've nene gomu' noso ne'mine molosa lehize-lidine' ve.

*Paulo' Aza A'mine Luhuvo Gizo Hulo-ngidine' Aleve Nemu' O'mosola Line'*

<sup>15</sup> Nemu' nene lingine Guvesi ve Izesu' Kilisito'nimu' gili ele'vole' nani' ido' Izesu' zuho muki' lutine ngimi nasahili' i-ngidaa' nani' ne'mi gamazi've nene naza gelo

<sup>16</sup> nemu' lengikumu' nene O'mosola isaa' neve lo gamene gamene opo'ni laa' nouve. Ido' ne'mino O'mosola lengikumu' laa' nouvongu' nene aza ne'mino hize ele' o-lengedelive losa ne'mine laa' nouve:

<sup>17</sup> Lingine O'mosomu' gili guni ilisa gili'mi vi nizavo Guvetesi ve Izesu' Kilisito' O'moso've aza emeni dameni lamine' golososi minidi'mo guvele monaa' ive meteho aza nene gamazi monovo do soto' ogo lengelebizo ido' gili vevesaa' lengemeni nesi nene lehize-lengedelive lo ezela laa' nouve.

<sup>18</sup> Ido' inite' ne'mine dalizave lo elese molo lingimine' gameneloti' gili ele'vole' igi a'minemu' gizebo igi minaa' nani' inite' nene aza guvesi inite' ne'mine mana'mine inite' lamine' nene vauve elo eze evenele leli' lemelesa salani molo-lidine' ne'mi monovo nene lingine mo ningi gili vevesi

<sup>19</sup> ido' amuzo ato ato' muki' ngivile' ogo osu' lo atoli'mine ogo dizo minine' amuzo've ne'mo laza ezemu' gele ele'vole' ogo minaa' nonive leli'



hize ele' o-ledaa' neine' ne'mi monovo nesi ningi gili vevesi minilizave lo nemukisi O'mosola laa' nouve.

<sup>20</sup> Ido' a'mine leze hize ele' o-ledaa' neine' amuzo atoli'mine ogo dizo minine' ne'mo nene Kilisitoda gono do mo hilinguti' do ote-do Okulumokuko do dize-do O'mosoloti' lemo minive'mi mo'mosi' Okulumoku' O'moso'mo ana hulaa' idaa hulo-davo mito' neive.

<sup>21</sup> Ido' ne'mino mino Kilisito' aza nene evene' guve'inesi ve dizi minani' limi minani' ngomo' naba' ido' ato ato' amuzo'inesi minave muki' idise mene gameneu' nizani' engikovo' nesi nevoba asi alinge' gamenela soto' igi minilizani' nesi muki' nene mo ngivile' ogo osu' gehepeve losa mukiliti Guve'inesi ve lolo' ogo neive.

<sup>22</sup> Ne'mino neivo O'moso ne'mo inite' muki' nene do Kilisito' gizeneukovo' leme-ngedo O'moso'mi evenele mulise lelito' nesi nene godotelo' minive mineleseive lo ele'mize molo-lidine' ve.

<sup>23</sup> Ido' Kilisito' nene godotelo' minive neivo eze evenele mulise laza nene ei' oko'no've linge lolo' ogo mino a'mine numudo' namado' inite' mata' mukiku' mine osu' lo minevo dovo' ogo minive eita vo gi'mizekunivo ezesi lezesi nene evene' hamo' ne'mine lolo' ogo nonive nene none.

## 2

*Laza Nene Helaa' Akalo' Mine Molo Min-uninguti' O'moso'mo Do Lu' Izine' Nemu' Paulo' Lo-ngimine'*

<sup>1</sup> Ido' lingine Zuda ve minamavesi gomu' monovo goloso palasa di soto' igi ido' lihimetinesi

ve minaa' adi'mo lutine nene mo hele vine' gelavo minanguti' nene O'moso'mo Kilisito'ni hilinguti' do ote-dingu' nene linginesi makato' do ote-lingidine' ve.

<sup>2</sup> Ee, gomu' nene lingine me misubou' aleveti monovo golosolo' e'meti nivi sikalahu' golosoliti muliselo' gizebo o neive eito' gelekele' igi minani' gameneu' nene monovo goloso palasa di soto' igi lihime di'mi vi minaa' ani' ve. Ido' a'mine sikalahu' golosoliti guve'inesi ve nene O'moso'mi gamazi gili hulaa' naveti lu'ningu' idise gono do minaa' ive nene neive.

<sup>3</sup> Ido' gomu' nene Zuda ve lazasi nene a'mine O'moso'mi gamazi gili hulaa' avete igi mili iga' adi'mine ogo laza muki' gomu' lemeni dameni goloso ne'mo umo hilido' e'meto okodesi ido' gatesi engi' lasido' ogo molo minaa' une' ve. Ido' evene' linge muki' minani' ne'mino lazasi nene O'moso'mo izebolo' molavo lebeledido' o minine' lemeni dameni golososi minune' ve.

<sup>4-6</sup> Ne'mino mino laza nene goloso initete ne'mo lutesi mo hele vivo minune' gelavo minune'za O'moso'mo leli' mulumote gelo isete vauve elo iza' ive minosa lulo atoli'mine ogo lemaa' neine' nenako nemu' nene Kilisito'ni aza hilinguti' do ote-dingu' nene goloso initete ne'mo lelikisi hilune' gelavo noninguti' nene makato' do ote-lidine' ve. Ido' Kilisito'ni nene Okulumokuko do dize-do evene' nabalitevo' minaa' ani' mo'mosito' ele'mize molangu' nene lelikisi a'mine'mine ogo do dize-ledo a'mine ne'mine mo'mositelo' lele'mize molani' gelave. O'moso'mo ne'mino do lu' izine' nene inite' mamukisi nomine' asi mo leli' do lamine' o-ledelove

losa do lu' izine' ve.

<sup>7</sup> Aza ne'mino do lu' izine' nene evene' alinge' gamenela vomine atoli'mine ogo aza leli' do lamine' o-lidine' nene ningilizave losa ngelebizelesa ne'mino do lu' izine' ve. Ido' ne'mine ogo do lu' izelesa Izesu' Kilisito'ni nene lelikumu' ogo helelive lo imiseline' ne'mo nene lelikumu' do atoli'mine ogo muhelete ningine' nene soto' ogo neive.

<sup>8</sup> Ee, O'moso'mo do lu' izine' nene inite' mukisi nomine' asi mo leli' do lamine' o-ledelove losa nasahili' o-ledavo Izesu'nimu' gele ele'vole' une' nemu' nene do lu' izine' ve. Laza leli' amuzoteloti' gono duningumu' do lu' izamive. Asi O'moso'mo haza gidini ne'mine o-lidine' ve.

<sup>9</sup> Ido' laza nene gono do minuningumu' do lu' izine' nomine' nenako nemu' nene leli' gono do minunidoti' ve lo okode do naba oga' nene ma nomive.

<sup>10</sup> Ido' ne'mine noluvoni' nene O'moso'mo asi've gono dosa leli' do soto' o-ledavo none' nenako nemu' noluve. Aza nene leli' olihe do soto' o-ledamosa leli' nene monovo lamine-tokovo' e'meti minilizave losa gomukuti' gele minine' nenako laza Izesu' Kilisitoda gi'mizekunivo nemu' nene aza a'mine monovo lamine' nene igi mili minilizangumu' ve lo lemeni dameni gosoho' do soto' o-lidine' ve.

*Gomu' Laza Nene Zuda Ve Minunivo Lingine Heta Ato' Ve Minavo Minunidoti' Nene O'moso'mo Kilisito' Evenele Lolo' O-ledo Do Hamo' O-ledave Lo Paulo' Lo-gimine'*

<sup>11</sup> Ido' lingine goloso gehepeve igi minanguti' nene O'moso'mo ne'mine ogo do lungu' izine'

nenako nemu' gatine molavo opo'ni lami minike-lizave. Nemu' nene O'moso'mi noso nene lengi' okodido' minamivo lingine heta ato' ve ve li li-lingidaa' ani' nemu' nene gatine molamivo ha gili minilo. Ee, evene' ingine a'inedunu' oko'ine lolovo huki hulaa' ani' nenako a'minemu' nene O'moso'mi noso do nonive ma nene none li laa' ave Zuda Ve ingine nene lengikumu' O'moso'mi noso di minamave ve li li-lingidaa' ani' ve.

<sup>12</sup> A'mine gamenelo' nene lingine O'moso'mi evenele zuho Isilaele' aleveti' minami heta ato' ve mini O'moso'mo Isilaele' aleve do ngu' izelive ma engita imiselelesa lo huko-ngidine' gamazi'mi lulou' nene lingine minami ido' Kilisitokisi nene do lungu' ezelido' mini mili minamani' gelavo ido' O'mososi nene lengikisi minamine' gelavo ido' inite' lamine' soto' o-ledeleseive li lingine gili ele'vole' igi a'minemu' gizebo igi minilizani' inite' nesi nene ma minamivo lingine misubouko haza minivi divi' igi mini mudise goloso ilizani' akalo' mini mili minani' nene gatine molamivo ha gili minilo.

<sup>13</sup> Ee, ne'mine igi minani'za lingine gomu' nene O'mosomu' ningi gilami abaza' minave ma nene idise mo Kilisitoda igi gi'mizikevo lihimetinemu' vanise've hulo hiline' ne'mo nene lengele'mize O'mosola ogavo nizave.

<sup>14</sup> Ido' ne'mine noluvoni' nene Kilisito' aza asi've nene heta ato' vesi Zuda vesi nene do hongu lo-ledo do hamo' o-lidine' nenako laza zou lo minune' monovo nene eitati' nenako nemu' nene noluve. Aza nene ge lukehe nebele ne lukehe gebele lo minune' monovote nene laza Zuda vesi heta ato' vesi minuningu' oluso' nene

gesi ne'mine minine' nene kelo lolotolo' ogo do hulo lele'mize hamo' ine' ve.

<sup>15</sup> Ido' Mose' aza ne'mine mana'mine ilo lo lou' gamazi ato ato' Zuda vemu' lo huko-ledavo ne'mi gesi mingu' minunivo ne'mo Zuda vesi heta ato' vesi do ato ato' o-ledavo ge lukehe nebele ne lukehe gebele lo minunivo Kilisito' aza Zuda vesi heta ato' vesi ato ato' minuninguti' nene do hamo' o-ledo a'mine zuho sita' minuninguti' nene hamo' zuho ne'mine gosoho' lolo' o-ngedelove lo ei' oko'no hulo hilidi'mo a'mine lou' gamazi nene do hulo do hongu lo-lidine' ve.

<sup>16</sup> Izesu' aza nene lohoto' zalo' hilidi'mo laza Zuda ve minunivesi heta ato' vesi nene hoto hoto' mino lovo lolize une' giline' nene do heleledo mulise hamo' lolo' o-ledo ido' O'moso aza lihimetemu' izebolo' molavo minine' nesi nene bele helo O'mosola makato' do bize-ledo zogo limine' ve.

<sup>17</sup> Ne'mine ogo hongu lo laminoovo' minali'mi gamazi nene O'mosomu' gilami abaza' minave heta ve linginesi ido' abaza' minamo O'mososi bizo minunive Zuda ve lelikisi nene ogo lo soto' ogo lo-lemavo gelekune.

<sup>18</sup> Ne'mine noluvoni' nene Kilisito' aza lihime-temu' helo heta ato' vesi ido' Zuda vesi sitato' O'moso metehida alone' akate vele-ledavo O'moso'mi Sikalahu' hamo' ne'mo lele'mizo a'mine akalo' ogavo laza sitato' a'mido' ha oga' nouné' nenako nemu' noluve.

<sup>19</sup> Nemu' nene heta ato' ve lingine gomu' nene venenga ve ne'mine ido' ga' ve ne'mine minani' nene gohi minami O'moso'mi evene'vela vi gi'mizi eze gizebo ingu' minuniveti zuhou' nene mudise vi gi'mizi minikeve.

20 Ne'mine igi mini ei' evenele lili' igi minikevo O'moso aza lengiku' minevo' alevo' ogo minine' ne'mo lingine nene ei' numu've ne'mine lili' igi nizave. Ido' laza aposolokisi polohetesi nene mono' numuno di oti gizaa' nani' simeni ne'mine nene nonivo numuno nene lelito' do ngi lo lehete o minaa' neive. Ido' Kilisito' neve nene numuno muki' do gili' lo do ngi lo do minaa' ive numuno langise ne'mine nene mino numuno muki' nene do ngi lo neive.

21 Ee, numunoli'mi oko'no vai' nene ezelo' lehete o neivo ne'mo nene Guvesesi ve'mi kekeize mono' numuno lolo' o'mo vo minaa' neive.

22 Ido' linginesi Guvesesi vela igi gi'mizani' ne'mo O'moso aza a'mingu' minevo dovo' ilive lo O'moso'mi Sikalahu' ne'mo linginesi nene a'mine numuno ne'mi lingelalati' nene lolo' o-lengede'mo novive.

### 3

*Paulo' Aza Heta Ato' Vemu' Ve Lo Mono' Gono Do Minine' Ne'mi Monovo Lo-ngimine'*

1 Ido' O'moso'mo ne'mino do lungu' izine' ne-nako nemu' Paulo' naza Izesu' Kilisito' goboni ve've mino eikumu' nene heta ato' ve lengita gono do minuvoni' nemu' Loma vete galapuso numungu' huli-nidikevo minuve naza O'mosola lengikumu' laa' nouve.

2 O'moso'mo lengi' nene ei' nasahili'veu' lengele'mize molalongumu' ve lo asi've lengikumu' neni' nene gono nimine' nemu' mo gili nilisave lo gele nouve.

<sup>3</sup> Ido' ne'mine o-nedo olosa giline' inite' haleko suno' minine' nene lo soto' ogo lo-nimine' nesi nene mo gili nilisave lo gele nouve. A'minemu' nene me luhuvo initeku' nene gamazi li'nibevo' gize nouvoni' ma neive.

<sup>4</sup> A'mine gizuvoni' gamazi nene gatisa naza Kilisito'nimu' gamazi suno' minine' gele guno o nouvoni' nemu' nene lingine gili lamine' ilisave.

<sup>5</sup> Ido' a'mine suno' minine' gamazi nene O'moso'mi Sikalahu've ne'mo idise mene gamenela Kilisito' aposolo've minilizave lo do kegese-lidive lelitasi ido' polohetelasi lo soto' ogo nolo-limine' ne'mino gomu' gamene vomila nene O'moso'mo evene' ma lo-ngemesa'mine' ve.

<sup>6</sup> A'mine gamazi gomu' haleko suno' minine' nene ne'mino neive: O'moso'mo eze evenele zuho lemelve lo lo huko-ledo salani molo-lidine' inite' nene Zuda ve lelikovo' dalobe lo gilune' inite' nene lelikovo' ma damolosune. Asi heta ato' ve lingine Kilisito'nimu' gamazi lamine' mene gili gili ele'vole' igi ezela gi'mizi O'moso'mi evenele lili' igi leli' Zuda vesi hamo' zuho lili' igi mini a'mine O'moso'mo inite' lemelve lo lo huko-lidine' gamazi ne'mi lulou' lelikisi makato' vi hili mini a'mine salani molo-lidine' inite' nene lelikisi makato' dalonido' minikeve.

<sup>7</sup> Ido' O'moso aza nasahili' o-nidine' ne'mo ei' amuzo've nene neniku' gono nodavo aza gono nemavosa a'mido' e'meto a'mine gamazi lamine' nene lo soto soto' ogo eze goboni ve ne'mine lolo' ogo nouve.

<sup>8</sup> Ee, naza nene gomu' minaa' uvodasi giluvoni' nene O'moso'mi evenele mukikuti' lemo minuve

minuvoni'za O'moso aza neni' nene do vevese-  
nedo nasahili' o-nidine' ne'mo Kilisitodati' nene  
monovo danava lamine tamine' vai' goloso lo  
neivo laza ngelo ningo gele osu' lamolone' o  
minine' inite' ne'mi gamazi've lamine' nene  
Zuda ve minamani' heta ato' ve lo soto' ogo lo-  
ngemeline lo

<sup>9</sup> ido' O'moso'mo leze Zuda vesi heta ato' vesi  
Kilisitoda do hamo' o-ledelesa giline' gamazi  
nene inite' mata' do soto' oga' ive O'moso aza  
nene gozopo' gamene aka'milati' ei' lulou' molo  
halekekivo suno' haza minine' gamazi nene  
evene' ato ato' mukilite ningi gililizangumu' nene  
neni' lo soto soto' ogo lo-ngemeline lo gono  
lamine' nemosane' mize molavo nove.

<sup>10</sup> Ido' O'moso'mo ne'mine ine' nene guve'inesi  
ve amuzo'ine ato atokisi okulumoku' veleta  
mini'mi monave nete leli' Zuda vesi ido' heta  
ato' vesi O'moso'mo do hamo' o-ledo eze evenele  
mulise gosoho' hamo' do soto' o-ledavo minunive  
lelitoti' nene ningisa O'moso aza nene ne'mine  
mana'mine gala gele nge lo minaa' neive li ningi  
gililizave losa ne'mine ine' ve.

<sup>11</sup> Ido' O'moso'mo ne'mine ine' nene gomu'  
gozopo' aka'milati' aza olosa giline' inite' nene  
Guvetsi ve Izesu' Kilisito' gono dadi'mo soto'  
ine' inite' nene do gihile izelove losa ne'mine ine'  
ve.

<sup>12</sup> Ido' Kilisito' gono dani' ne'mi gihile've nene  
laza ezemu' gele ele'vole' ogo mino O'moso'mo  
lebelelihe lo golise gelamo mo hize ele' o-  
ledeleseive lo gele ele'vole' ogo ezemu' lehelele  
izamivo gamazi ha lo-emma' olone' akate nene  
Kilisito' mo vele ngolose-ledavo O'moso gamazi



ha lo-emaa' none.

<sup>13</sup> Ido' O'moso'mo gono nimidoti' nene inite' lamine' ne'mine soto' oga' neine' nenako nemu' nene naza ti' lo nolo-lingimuve: Naza lengi' lengele'mize lamine' olosa gono do minuvoni' ma'mo goboni mili-nidi nala' numungu' huli-nidikevo geni initeli'mi lulou' nouvoni' nemu' nene geni lengebelamivo minilo. A'mine geni initeli'mi lulou' nouvoni' nene lengikumu' ve losa nouvoni' nenako Paulo' lelikumu' gelavo dizave li neloti' lingine ningi gili longolize izilizado' o neive.

*O'moso'mo Hize Ele' O-lingidivo Kilisito' Lulo Lemo Nasahili' O-ledaa' Neine' Monovo Nemu' Lingine Gili Osu' Lilizave Lo Paulo' O'mosola Lingumu' Lo-ngimine'*

<sup>14-15</sup> Ido' O'moso'mo ne'mino do lungu' izive lo gomu' lo-lingimuvoni' nemu' nene naza oku-lumokuko misubouko ato ato' zuho mine'mo monune' mukiliti gulivetesu ido' lemeni damenisi do soto' molo-ledaa' ive meteho O'mosola nene obuvo'ne hizo lengikumu' nene ti' lo laa' nouve:

<sup>16</sup> Ei' emeni dameni atoli'mine lamine tamine' neine' votigilelo' nene do molo amuzo lenge-mavosa Sikalahu've ne'mo lutingu' hize ele' o-lingidivo

<sup>17</sup> ne'mo Kilisito'nimu' gili ele'vole' igi minikevo aza lutingu' minevo dovo' ogo minelive. Ido' ne'mine ogavo lingine lute ngemo nasahili' o-ngedaa' monovolo' nene e'meti minikevo ne'mo monoku' luhivetine do ngi lo-lengedavo amuzo mili minilizave.

18-19 Ido' ne'mine ilizave lo O'mosola laa' nou-voni' nene Kilisito' do atoli'mine ogo lulo lemo nasahili' o-ledaa' neine' monovo nemu' nene evene' laza mudise gele osu' lamolonido' o neine' monovomu' nene gilisa Kilisito' do atoli'mine goloso ogo vauve elo lulo lemaa' neingumu' nene O'moso'mi evenele mukikisi gili nge li minikevo ne'mo O'moso'mi emeni dameni vai' nene lutingu' vai' lo minelive lo O'mosola laa' nouve.

<sup>20</sup> Ee, laza O'moso'mo ne'mine mana'mine inite' ha oloseive lo gilune' inite' ido' ne'mine ilive lo ezela laa' nounge' inite' muki' nene ivile' ogo ei' amuzo've ne'mo leli' luteu' gono do minaa' neine' ne'mo nene atoli'mine inite' vauve elo iline' amuzo'vesi neine' nemu' nene

<sup>21</sup> laza Izesu' Kilisito'nimu' gele ele'vole' ogo O'moso'mi evenele mulise lolo' ogo nonivete ezemu' opo'ni lo'mo vo nonivo kilisimasi ogo voka' voka' ogo mineline' nene mo osu' lamivo mo ne'minovo' miniliho.

## 4

*O'moso'mi Sikalahu' Ne'mo Do Hamo' O-ledosa Do Kilisito' Oko'no Ne'mine Lolo' O-ledavo Noningukovo' Nene Hongu Lo Minelone Lo Paulo' Lo-ngimine'*

<sup>1</sup> Ne'mine o neine' nenako nemu' nene lingine O'moso'mo elese molo-lengedo ei' ve lo lengele'mize molavete e'metikevo lisihe' iline' monovolokovo' lisihe' igi e'meti vivi' vivi' igi minilizaho lo agae lo naza Guvelesi ve'mi goboni ve minuvongumu' nala' numungu' huli-nidikevo minuve'mine nolo-lingimuve.

<sup>2</sup> Lिंगine ne'mine idi nivilizanguti' nene lutine've di dizami lopoşo lengemeni dameni di otuhi minanguti' O'moso'mo do gatine lo-lengedavo nizadokovo' nene mini ato ato' inite' lengita soto' neivo ma hongu li mini lengi' okodingu' nene eze izebolo' molali inite' anivo anivo ge gizebolo' molali inite' ivo ivo li minilizangumu' nene gili hulisa asi goşele' lengebelamivo lutine ge neme ne geme livo' minilo.

<sup>3</sup> Ido' ne'mine igi mini O'moso'mi Sikalahu' ne'mo do hamo' o-lengedavo hongu lo minali'mi geşi mingu' nizanguti' nene limi vami lutine di hamo' igi a'mine monovolo' nene amuzo mili e'meti vi minilo.

<sup>4</sup> Kilisito' evenele mukito' laza nene Kilisito' oko'no hamokuti' ne'mine nonivo O'moso'mi Sikalahu' hamo' ne'mo nene leli' mukiku' nene minevo dovo' ogo neive. Ido' a'mine'mine ogo O'moso'mo do lamine' o-lengedelove lo eleşe molo-lingididoti' lिंगine gili ele'vole' igi a'mine gizebo igi minani' initekumu' nene laza mukito' a'minemukovo' gele ele'vole' ogo gizebo ogo none.

<sup>5</sup> Ido' Guvetesi ve nene hamokovo' neivo eito' gele ele'vole' une' nene mukito' gele hamo' o none. Ido' Guvetesi ve hamokumu' nene gele ele'vole' o mino mono' noso holaa' nune' nene ei' gulive hamotokovo' noso holaa' none.

<sup>6</sup> Ido' O'moso nene mukito' meteho hamo' nene neive. Ei' neve evene' muki' nene livile' ogo osu' losa dizosa neive. Ne'mine ogo mino evene' mukiliti vovoteu' mino luteu' luteu' gono do neive.

<sup>7</sup> Ne neiha Kilisito' aza leli' hamo hamo' lehize-

ledelesa giline' votigilelo' nene leli' muki' hamo hamo' nene monoli'mi amuzo lehize-ledave.

<sup>8</sup> Nemu' nene mono' godolou' ti' li gizi nizani' ma neive:

Guvelesi ve aza biluva've ngivile' ogosa oto hozeuko dizo vingu' nene lovouti' galapuso ve ne'mine

do mulise molo-ngedo ngele'mizo voosa

inite' ato ato' nene ei' evenele lehize-ngidine'.

<sup>9</sup> Ido' hoziuko dizo vine' ve li gizangumu' nene laza nadive lo geledone. Aza nene gomu' misubouko lemosa mo misubo luloukosi homine leme pelosa dizo vine' ve lo gelelesune.

<sup>10</sup> Ido' misubouko mene lemo ave ne'mi emeni dameni ne'mo nene misubou' ido' okulumoku' mine giki' ogo minelive lo okulumo' ningaa' none' nene ivile' ogo ido' ma ningamune' muki' nene ngivile' ogo mo hoziu' goloso dizosa minine' ve.

<sup>11</sup> Ido' a'mine ve ne'mo inite' ato ato' monoli'mi amuzo ne'mine nene evene' linge leze nene aposolo minilizave lo lele'mize molaa' ido' linge ma eze veleuti' gamazi li soto' iga' ave polohete minilizave lo ne'mi amuzo lehize-ngedaa' ido' linge ma nene mono' gamazi lamine' nene li soto' igi li-ngimiliza amuzo lehize-ngedaa' ido' pasitoli gonou' ngele'mize molaa' ido' mono' apizi ngimaa' ilizave lo ngele'mize molaa' neive.

<sup>12-14</sup> Ido' O'moso'mo ne'mine ogo monoli'mi amuzo ato ato' lehize-ledo ne'mine gonolo' lele'mize molaa' neine' nene eze aleve lelikumu' nene monoku' izipe ngomo ne'mine minikevo tilikilo' ve ingine lengele'mize gopo ilisa gotine izi soza mono' ato ato' li-lingimikevo ne'mo gamene

gamene hepeli'mo pipiza' nite' do volelo' melo' oga' neine' ne'mine igi mini me monoku' volobe ido' ma monoku' me volobe li minikelizave lo O'moso'mo eze evenele nene ge hize ele' o-nede ne hize ele' o-gede li gono di'mi vi mini lengi' mulise Kilisito' oko'no ne'mine neine' nene hize ele' ikevo amuzo molo minavo lingine muki' nene O'moso neni' gipe'nemu' gili ele'vole' igi ei' monovo've nene gili vevesi minikevo ne'mo lutine do hamo' ogavo monoku' lodive igi Kilisito' emeni dameni vai' nene lengita mine osu' lilido' o minivo minilizangumu' ve lo a'mine gono nene leli' daloningumu' ve lo do va'va' o-ledo gono ato atoku' lele'mize molaa' neive.

<sup>15</sup> Ido' mono' gono ato atoku' lele'mize molaa' neine' nene laza tilikilo' ve golosolite iga' ani' ne'mine amosa gamazi gihile laminetokovo' nene e'meto evene' lute ngemo a'mine gamazi laminekovo' nene lo-ngeme'mo vo minelone' ne'mo leze godotelo' minive Kilisitoda nene gi'mize lamine' okunivo eze emeni dameni vai' ne'mo lezela mine vai' lo neivo monoku' lodive oloningumu' ve losa mono' gono ato atoku' lele'mize molaa' neive.

<sup>16</sup> A'mine godotelo' minive ne'mo nene eze oko'no ne'mine minunive leli' nene lingela lingela gono ato ato' limine' votigilelo' votigilelo' do molo gono lisihe' ogo nodunivo a'midoti' nene do hamo' gehepeve o-ledavo ne'mo nene a'mine oko'no ne'mine minunive mulise vai' nene monoku' naba oka' oka' o'mo vo mino mukito' nene lute ge neme ne geme lo minune' ne'mo do amuzo molo-lede'mo vo minivo minaa' noune.

*Lingine Gomu' Igi Mili Monaa' Ani' Monovotine  
Nene Mehedine Imi Gosoho' Lengemeni Dameni  
Lingimido' Nene E'meti Minilizave Lo Paulo' Lo-  
ngimine'*

<sup>17</sup> Nemu' nene naza Guvelesi ve'mi velemu' ogo gamazi mene amuzo molo ti' lo nolo-lingimuve: O'mosomu' gilamave heta ato' ve ingine nene gihile've nomine' initekumukovo' ga'ine gilaa' nani' nenaze. Lingine engi' monovo'nido' nene gohi nge'metamilo.

<sup>18</sup> Inginge nene lu'ningu' liti'muso ize minine' ne'mo negi hizi mini O'mosomu' gililisa ani' nene lu'ine ngi lo a'manapa ogavo O'mosolati' minevo' minevo' minaa' ngemeni dameni nene engita nomivo minaa' nave.

<sup>19</sup> Ido' lu'ine ngi lo a'manapa ine' ne'mo nene goloso initekumu' ngovozo hilami okode'mo lanite' gelaa' neine' monovo goloso lute do goloso oledaa' neine' monovo muki' nene gosele' ngebelamivo vauve goloso ilisa igi mili mini inite' gohi gohi dalone li minaa' nave.

<sup>20</sup> Ido' Kilisito' monovo've lingine gilaa' ani' ma nene lingine engi' iga' ani' ne'mine ilizave losa nomive.

<sup>21</sup> Ei' monovo nene mo li-lingimikevo lingine ezela vi gi'mizikevo ei' Izesudati' gamazi gihile lamine' nene mo apizi lingimikeni' noloseive lo gele nouve.

<sup>22</sup> Ido' nemu' nene lingine gomu' monovo goloso igi mili minaa' adoti' ha minine' lengemeni dameni litehe ne'mo nene leli' gote izo lele'mize goloso oga' neine' initekumu' nene umo helaa' neine' nenako nemu' lingine a'mine gomu'

lengemeni dameni nene mo di hulilo.

<sup>23</sup> Ne'mine ikevo lutine gatine've nene gosoho' ogavo mini

<sup>24</sup> lengemeni dameni gosoho' nene di otuhi lingine nene O'moso'mi emeni dameni ne'minesi mini gamazi lamineli'mi gihile've nene di soto' igi evene' lisihe' lamine' minaa' ido' O'moso gelekele' o-do minakumu' nene lutine mili minilo.

<sup>25</sup> Nemu' Kilisito' evenele laza okode do hamo' ogo noninguti' nene okode lingela lingela ne'mine mino vaito' bizo none' nenako nemu' mukito' lingine soza saza laa' monovo nene huli evene' ma gamazi li-ngimilizani' nene mo laminetokovo' li-ngimilo.

<sup>26-27</sup> Ido' lingine inite' mamu' lingizebolo' molavo muludingu' goloso gililizani' ne'mo nene lihime lengemeline' o neine' nenaze. Lingine nene inite' mamu' muludingu' goloso gili minilizani' ne'mo Satani aza ogo do gopo o-lengedeline' aka've di ngolo' li-dikevo ogalize. Goloso gililizani' nene lengita ha minivo ho' nene lemo su'mizalize. Nemu' ehee' igi mini muludingu' goloso gililizani' nene geti di hulilo.

<sup>28</sup> Ido' gomu' gumine daminelo' ve minave ingine idise a'mine monovotine nene hulisa lengi' adinedunu' gono laminekovo' disa inite' vise' igi minilizani' aleve hize ele' o-ngedelone' votigilelo' nene inite' pata' do soto' molalone li gono amuzo mili di minilo.

<sup>29</sup> Ido' lengi' vetinguti' nene gamazi goloso mo keke' hamokisi lami gamazite gililiza aleve nene ngele'mize lamine' olone li eze hize ele' o-divo

eze hize ele' o-divo li minaa' akamu' nene vise' igi di soto' igi gamazi laminekovo' li minilo.

<sup>30</sup> Ne'mine igi mini O'moso'mo ei' ve lo meni hizi ve leli' nene alinge' mudise do lu' izo lele'mize eita ilingumu' ve lo noso molo ei' Sikalahu've lehize-lidine' nenako nemu' lingine O'moso'mi Sikalahu' aza nene goloso gelo muhele' ogo mineline' inite' ne'mine i-damilo.

<sup>31</sup> Ido' muludingu' ekese' goloso gelaa' ido' muludingu' olo' laa' monovo ido' lingizebolo' molaa' monovo ido' evene' geke' goloso li gotinguti' li-ngimaa' monovo ido' evene' divi ledivi' igi ngemenga laa' monovo ido' ne'mine mana'mine monovotine goloso muki' nene ogo molo ogalone li olovo' igi minilo.

<sup>32</sup> Ezemu' mulumo gelanivo gezemu' mulumo gilivo li mini ne nasahili' o-gede ge nasahili' o-nede li mini Kilisito' lihimetinemu' hiline' ne'mo O'moso'mo a'mine lihimetine nene mo hulo-lengedavo nizani' nenaze. Lingine a'mine'mine igi lengikumu' evene' malite goloso gili lihime dalizahe ido' lingine engikumu' goloso ma gili lihime dalizahe ilizani' lihimetinemu' nene gili huli minami ge hulo-nede ne hulo-gede li minilo.

## 5

*Liti'musou' Minani' Gamenelo' Monovo Goloso Igi Mili Minaa' Ani' Monovo Nene Huli O'moso'mi Emeni Damenilo' E'meti Labanali'mi Emeni Dameni Di Otuhilizani' Monovomu' Paulo' Longimine' Gamazi*

<sup>1</sup> Ido' ne'mine ogo O'moso'mo lihimetine hulo-lingidine' nemu' nene lingine O'moso'mo lulo



lingimine' izipahala minani' nete nene ei' emeni dameni ne'mido' gehepeve e'metilizado' o neine' nenako nemu' nene e'meti minilo.

<sup>2</sup> Ido' O'moso'mo unuvo lamine' gelo mulunou' lamine' gelelive li sipisipi ize nevo'mine bili oloku' gizi O'moso imaa' nani' ne'mine ogo Kilisito' aza nene leli' lulo limidi'mo lelikumu' oko'no nene hulo hiline' ve. Nemu' lingine nene a'mine'mine igi lutine ngemaa' monovo nene lengita minivosa a'mido' e'meti vi minilo.

<sup>3</sup> Ido' vene' vemoho' gipe alu gopo ingaa' monovo ido' ne'mine monovo lute do goloso iline' monovo ato ato' nesi ido' inite' gohi gohi dalisa gilaa' monovo nene O'moso'mi evenele laza ogo molo amolonido' o neine' nenako lengi' vovotingu' a'mine monovo nene ngomosi mo soto' ogalize. A'mine inite' goloso nemu' nene li volelo' melo' igi gohi di gatido' milamilo.

<sup>4</sup> Ido' lingine nene ekese' gamazi nesi lami ido' dingani gamazi nevo'mine nesi lami ido' ha gize' zohi' gamazi nolube li monovo laminekumu' di gopo igi lami ido' monovo golosomu' nene vetete' igi lami O'moso opo'ni li minilo.

<sup>5</sup> Ee, vene' vemoho' gipe alu gopo'napa ingi'mi monaa' nave nehe ido do goloso o-ngedeline' monovo goloso igi mili iga' nave nehe ido' inite' gohi gohi dalone li gilaa' nave nene a'mine inite' ne'mo engi' O'moso'ine gelavo soza o'moso opo'ni li minaa' ave ne'mine ve nene O'mososi Kilisitokisi gizebo i minasingu' nene vi hilami salani mili-lidasine' inite' nesi nene ma damilisave lo laminetokovo' nolo-lingimuze. Gili minilo. Ido' a'mine ne'mine monovo daa'

nave nene O'mososi Kilisitokisi gizebo i minasingu' nene vi hiamilisanako nemu' nene lingine a'mine ne'mine monovo nene damilo lo nolo-lingimuve.

<sup>6</sup> O'moso'mi gamazi gili disa'mave nete nene a'mine ne'mine monovo goloso daa' nani' nenako nemu' O'moso izebolo' molavo lihime ngemeline' nenaze. A'mine ne'mine monovo goloso nemu' nene gotine izi soza saza gamazi nili-lingimavo ma nene a'mido' gili ngimamilo.

<sup>7</sup> Nemu' nene lingine ne'mine alevesi gi'mizo maka' monalone li ehee' igi minilo.

<sup>8</sup> Lingine gomu' nene liti'musou' ne'mine minani' ma neine'za idise nene mo Guvelesi vela igi gi'mizi mini labana' ne'mi lulou' nizani' nenaze. A'ne'mine alevelo' nene gi'mizami labanali'mi emeni damenisi minani' nete igi mili minilizani' lisihe' iline' monovolokovo' nene e'meti vi minilo.

<sup>9</sup> Ee, labanali'mi gihile ne'mi emeni damenisi minave ingine nene monovo laminekovo' igi mili evene' lisihe' mini evene' go'ine izami gamazi nene laminetokovo' laa' nani' nenako nemu' nene laza labanali'mi emeni damenisi minunive leli' monovotelokovo' nene e'meti vi minilizangumu' luvoni' ve.

<sup>10</sup> Ido' ne'mine igi minilizangu' nene Guvelesi ve'mo ningivo lamine' iline' monovomukovo' nene vise' igi ningi igi mili minilo.

<sup>11</sup> Lingine evene' liti'muso ne'mi lulou' mini monovo goloso igi mili minaa' nani' ne'mo nene gihile izesa'mine' nenaze. Engikisi zogo mili bizi minami asi a'mine monovo'ine goloso nene hulilizangisi di soto' i-ngidilo.

12 Ee, ingine haleki igi mili iga' nani' monovomu' nene laza ma ogo molo amo noloba ha vetetekovo' olone' nesi nene lovozo helestonido' o neine' nenako nemu' nene a'mine monovo'ine nene di sotokovo' i-ngidilo.

13 Di soto' ikevo miniliza inite' muki' nene labanato' soto' igi minikevo labana' ne'mo engi' monovo'ine nene do soto' ogavo sotokovo' mi-naa' neive.

14 Ido' ne'mine noluvoni' nene a'mine di soto' ikevo miniliza inite' muki' nene labanali'mi emeni dameni di otuhilizado' o neine' nenako nemu' nene luvoni' ve. A'minemu' nene nama ma ti' li laa' nave:

Upuho' igi otlevo. Lutine okise ongavo minave lingine hili minani' gili minanguti' nene otlevo. Otikeyo Kilisito' aza hize labana' ele-lengedeleseive.

15 Nemu' nene lingine evene' ga'ine gili nge li mini igi mili isa'mave nete iga' ani' ne'mine ami asi evene' ga'ine gili nge li mini monovo laminekovo' igi mili iga' nani' ne'mine igi monovotine igi mili mini di vilizado' nene gizebo lekeseseve igi minilo.

16 Ido' idise gameneu' evene' ingine nene monovo goloso di soto' i'mi vivo' nizanaze. Lingine haza gopo moni minami monovotido' gizebo lekeseseve igi mini evene' hize ele' i-ngidiliza gonotine lamine' soto' iline' nene mo diivo' minilo.

17 Ee, evene' ingine nene monovo goloso di soto' i'mi vivo' nizani' nenako nemu' negi hizi gopo' napa minami Guvesi ve'mo ei' lulou'

nene lengikumumu' nadi' igi minilizave lo gele no-lihe nemukovo' nene ningi gili hehe li minilo.

<sup>18</sup> Ido' lutine nene do gopo o-lengedavo vi tolovo ikelizaze. Negi noso nene ni sipaki igi minamilo. Asi O'moso'mi Sikalahu' ne'mo nene lutine vaito' gizebo o neivo mini ei' lilidokovo' nene e'meti minilo.

<sup>19</sup> Ido' gamazi li volelo' melo' igi minilizangu' nene mono' nama ato ato' O'moso opo'ni li laa' nani' ido' O'moso'mi Sikalahu' ne'mo lo soto' ogo lo lengemeline' ne'mine nama nene li mini Guvesi ve nene lutinedunu' opo'ni li longolize izi minilo.

<sup>20</sup> Ne'mine igi mini lengita soto' iline' inite' mukikumumu' nene Guvetesi ve Izesu' Kilisito' velemu' igi gamene gamene O'moso metehine nene tangezo' li-di opo'ni li minilo.

<sup>21</sup> Ido' Kilisito'nimu' nene evene' naba lamine' ve li ezemu' lengehelele izivo mini ei' gala gilido' e'meti lingine nene ge gelekele' o-nede ne gelekele' o-gede li minilo.

*Vene' Vemoho' Engi' Igi Mili Miniliza  
Monovomu' Paulo' Lo-ngimine' Gamazi*

<sup>22</sup> Ido' a'mine'mine igi vene' nete Guvetesi vela gelekele' i-daa' nani' ne'mine igi vadinge lilizado' gelekele' igi minilizado' o neine' nenako gelekele' i-ngidi minilo.

<sup>23</sup> Ee, Kilisito' aza evenele muliseti godotelo' minive minine' ne'mino vadinge nene godotido' minave nizani' nenako nemu' nene gelekele' i-ngidi minilo. Ido' Kilisito' aza nene godotelo' minivevo' minine' nevoba ei' evenele ei' oko'no

ne'mino minunive nene do lu' iza' ive ne'mine nesi minine' ve.

<sup>24</sup> Nemu' nene eze evenele mulise Kilisito'nimu' gelekele' o-do minaa' nounge' ne'mine igi vene' nete va'ninge lilizani' inite' mukikumu' nene gelekele' i-ngidilizado' o neive.

<sup>25</sup> Kilisito' aza nene evenele zuho mulise nene lulo limidi'mo lelikumu' oko'no hulo hiline' nenaze. Vemoho' lingine a'mine'mine igi eledingine nene lutine ngimilo.

<sup>26</sup> Ido' Kilisito' ei' evenele mulisemu' ei' oko'no hulo hiline' nene aza a'mine'evene' mulise nene gamazi'ne lo-ngemo noso holo-ngedeloni' ne'mo neni' ve lo ngele'mize molo lu'ningu' goloso neine' nene gilite osu' lo-ngedelove lo

<sup>27</sup> ido' a'mine'evene'ne mulise neti oko'nido' nene hu'ine ne'mine inite' gulososi nomivo mini ido' gonolise'ine laminekisi minani' gelavo na'nise'ne nenita do gi'mize-ngedekuvo lihime'inesi ido' gamazi'inesi nomine' minilizave lo nemu' nene ei' oko'no hulo hiline' ve.

<sup>28</sup> Ido' a'mine'mine igi vemoho' nete lengi' okodinemu' gilaa' nani' ne'mine igi lengi' eledinginemu' gili lutine ngimilizado' o neive. Ve ma ingine ele'ningine lu'ine ngimi minaa' nave nene mo engi' oko'inesi nene ne'mine nii-dave.

<sup>29-30</sup> Ee, evene' hamolitesi engi' oko'inemu' nene goloso ma gili imaa' navoba asi noso' nite' lamine' nene di vele vele igi a'mine oko'ine nene ganala daliko li gizebo lamine' i-daa' nani' nenako ido' eledingine nene lengi' okodine ne'mine nizani' nenaze. Nemu' nene lingine a'mine'mine igi lutine ngimilizado' o neive. Ido' Kilisito' evenele mulise laza nene ei' oko'nolo' gizene ana

nevo'mine none' nenako aza nene a'mine'mine ogo leze lute'mi noso' nite've nene do vele vele o-ledo ganala dikelizave lo gizebo lamine' o-ledaa' neive. Nemu' nene ingine engi' oko'ine i-daa' nani' ne'mine igi ele'ninginesi a'mine'mine ingidilizave nene mo Kilisito' ei' evenele leli' o-ledaa' neine' ne'mine igi minilisave.

<sup>31</sup> Mono' godolou' ti' li gizi nizani' ma'minosa nene neive:

Nemu' nene vehomo' aza izelehingi melehingi  
                   nene hulo elenahida vo bizo minavo  
 ingine nene evene' hamo' ne'mine lolo' igi minilisasive.

<sup>32</sup> Ido' a'mine mono' godolou' gizani' gamaziu' nene aneza gamazi dizo minine' ma haleko neive. Naza a'minemu' nene giluvo evene' hamo' ne'mine lili' igi minilisasive li gizani' nene Kilisito'nimukisi ido' eze evenele mulise leli' nesi nene hamo' lili' igi minilisasive li li mili gizikeni' neive.

<sup>33</sup> Ido' ne'mine li mono' godolou' gizani' nene Kilisito'nimukisi eze evenele zuho mulisemukisi nene li gizani'za a'mine nene mo lengi' vene' vemohotasi nene vo do neize. Mukito' lingine lengi' okodinemu' gilaa' nani' ne'mine igi venetinemu' gili lutine ngimikevo vene' lingine nete vadinginemu' nene evene' nabate mo gelekele' o-ngedelonido' o neive li vadingine gili ngimi mini di vi minilizave.

## 6

*Izipaha'inesi Ize'ninge Me'ningesi Igi Mili  
 Miniliza Monovomu' Paulo' Lo-ngimine' Gamazi*

<sup>1</sup> Ido' Kilisitoda gi'mizi minave nete igi mili ilizado' o neine' monovolo' nene izipe lingine izetingine metingine gelekele' i-ngidi minilizado' lisihe' o neine' nenaze. Lingine gelekele' i-ngidi minilo.

<sup>2</sup> Nemu' nene mono' godolou' ti' li gizi nizani' ma neive:

Lingine izetingine metinginemu' giligevo dizo minavo na'na' i-ngidi minilo.

Ne'mino neine' nenako Mose' aza aka gamazi muki' nene gize'mo nolemo a'mida nene O'moso'mo do lamine' o-ledelesa lo huko line' gamazi imine' molo ma gizamo a'mine mene luvoni' gamazi malo' nene gana' api' ogo ne'mine gamazi ma imine' molo ti' lo gizine' ve:

<sup>3</sup> Lingine izetingine metinginemu' giligevo dizo minavo na'na' i-ngidi minilizani' ne'mo nene naza lokuvo

misubouko mene vetinesi gamene ha'na lamine' ha mini di vi minilisave.

<sup>4</sup> Ido' ize'ninge me'ninge lingine izipahatine nene ngizebolo' molali inite' inite' i-ngidami Guvelesi ve'mi monovomu' apizi ngimi eze aka'velo' e'meti vi minilizangumu' ve li di hehe li-ngidi minilo.

*Gonou' Vesi Gizebo Ve'inesi Igi Mili Minilizani' Monovomu' Paulo' Lo-ngimine' Gamazi*

<sup>5</sup> Ido' gonou' ve lingine nene Kilisito' gamazi lido' gili di minani' gilivosa me misubouko gizebo i-lingidaa' navetine nene evene' nabate nizave li engikumumu' lengehelele izivo mini lutine mili hamo' gehepeve i mini lilizado' gili di gelekele' i-ngidi minilizave.

<sup>6</sup> Ido' gonou' ve lingine gizebo vete nete lezemu' ningi lamine' gililizave li engi' ve'nido' nene gono amuzo mili daa' nave gili gono di minisa ido' alinge' gizebo vetine nete ningamavo gono gilizevo igi di minaa' nani' ne'mine nene amilo. Kilisito' goboni ve gihilelite gono dalizani' monovo lisihetokovo' nene e'meti O'moso'mo gilido' nene e'meti gizebo vetine nete gono lingimilizani' nene lutine laminetotikovo' dalo.

<sup>7</sup> Ee, evenekumu' gono dami asi Guvelesi vemu' gono dani' gilivosa lingine nene lutine lamine' o minivo a'mine gizebo vetine nete gono lingimilizani' nene dalo.

<sup>8</sup> Lingine mo gili nizani' ma neive. Ve malite gono lamine' dalizani' nene Guvelesi ve'mo meni lamine' ngemeleseive. Ido' a'mine ve nene gelekele' ve nilizahe ido' gelekele' ve minami haza ve nilizahe a'mine hamo hamo' mukito' nene gono dalizani' votigilelo' votigilelo' ogo meni ngemeleseive.

<sup>9</sup> Ido' gonolo' veti gizebo ve'ine lingine a'mine'mine igi gonou' vetine nene monovo laminekovo' i-ngidilo. Lingine gili nizave. Gizebo ve lengi' nesi gonou' ve nesi gizebo vetine hamo' minive nene Okulumoku' Guvelesi ve hamo' nene neive. Ido' aza nene ningivo laza linge ma dizo nonivo linge ma limi minikevo minamo laza mukito' nene lisihetokovo' none. Nemu' nene gizebo ve lingine gonou' ve nene gono amuzo mili dalizangumu' ve li golise gililiza inite' inite' i-ngidaa' nani' nene huli monovo laminekovo' i-ngidilo.

*O'moso Biluva' I-daa' Ave Lovo O-*



*ngemelongumu' Nene Laza O'mosolati' Lovo Hizaa' Inite' Dosa Minelongumu' Paulo' Longimine'*

<sup>10</sup> Ido' naza gamazi lo osu' nolo ti' lo noluve. Lngine Guvelesi vela vi gi'mizi mini eitatikisi amuzo disa ele'vole' igi minilo.

<sup>11</sup> Satani ne'mo gotine izo do gopo'napa o-lengedo lingivile' olosa iline' nene lngine mo limi ingami ha ele'vole' igi oti minilizangumu' ve li O'mosolati' lovo hizaa' inite' muki' nene di okodida igisa minilo.

<sup>12</sup> Ido' laza ne'mino lovo hizaa' inite' O'mosolati' do ngolo minelone' nene nanitekumu' ve. Laza lovo olone' nene haza evene' leli' okodesi ne'mine minani' nene lovo o-ngemelone' nevoba asi Satani'mi zuho goloso guve'inesi ve naba amuzo'ine ato atokisi minave okulumo' gahevela minaa' nani' inite' ingine nene me misubouko evene' liti'musou' ne'mine ha minavelo' nene amuzo mala' mala' i-ngidi gizebo i-ngidi minaa' nave engikisi lovo hizelone' nemu' nene O'mosolati' lovo hizaa' inite' nene do ngolo minelone.

<sup>13</sup> Nemu' nene Satanilati' ve goloso ingine lovo i-lingimilizangu' nene lngine limi ingami ha oti pehe li amuzo mili mini mo ngivile' igi osu' li minilizangisi O'moso'mo lovo hizaa' inite' muki' lemaa' neine' nene ha di minilo.

<sup>14</sup> Ido' ne'mine igi lngine lovo hizi ngivile' ilizangumu' ve li ele'vole' igi oti mini gamazi laminetokovo' laa' monovo ne'mo nene gopotido' leti ne'mine lolo' ogo minavo ido' monovo lisihe' ogo molo minaa' ne'mo nene losodido' lepese ne'mine lolo' ogo minavo

<sup>15</sup> ido' mono' gamazi lamine' hongu lo minaa' monovomu' lo-lemaa' neine' ne'mo nene lisi ngi li minilizangumu' suu' ne'mine lolo' ogavo

<sup>16</sup> inite' linge muki' ne'mine disa Kilisito'nimu' gili ele'vole' iga' nani' nedunu' nene ve golosolati' olo' lo minine' elese aline' nene bili lihizi di hulilizado' i minilizani' nenako nemu' nene a'mine gili ele'vole' iga' nani' ne'mo nene lepese naba ne'mine lolo' ogavosa di minilo.

<sup>17</sup> Ne'mine igi O'moso'mo do lu' izaa' neine' ne'mo nene lovo angilitine ainidunu' lili' ani' ne'mine lolo' ogavo di gihi mini O'moso'mi gamazi ei' Sikalahu'veli'mo lengemaa' neine' ne'mo nene bainati mite' ne'mine lolo' ogavo di minilo.

<sup>18</sup> Ne'mine igi mini lingine nene O'moso'mi Sikalahu' ne'mi amuzololo' nene gamene gamene O'mosola li mini inite' nanitekumu' vise' ilizahe nemu' nene O'mosola livo' minilo. Ne'mine ilizangumu' nene gosele' lengebelamivo lutine okise ongamivo mini O'moso'mi zuho muki' engikumu' nene O'mosola livi' livi' igi minaa' ilo.

<sup>19-20</sup> Ido' naza Izesu' velemu' ogo ezemu' gamazi lamine' gomu' suno' minine' nene lo soto' oga' nouve nouvoni' nenako nemu' nala' numungu' huli-nidikevo nouvongukisi a'mine gamazi lamine' nene lovo' kiselevo' ogo lo soto' olodo' o neine' nenako nemu' nene lingine O'mosola lilizangu' nene lovo' kiselevo' ogo lo soto' olongumu' ve li nenikumukisi nene Guvelesi ve'mo ve'ne do lapa nomine' ogavo a'mine gamazi lamine' nene nehelele izamivo ve'ne telo lo soto' olongumu' ve li O'mosola nenikumu' lilo.

*Paulo' Luhuvo Gize Osu' Lolosa Geke' Lo-ngedo  
Gizine' Gamazi*

<sup>21</sup> Naza mela mine molo nouvongumukisi ido' gono do nouvongumukisi nene Tikiko' vo lo-lengeme osu' lilive lo imiselekuvo novive. Aza nene Kilisito' aleve leli' zuho Guvetesi ve'mi gelekele' izipe've lisihe' lamine' neivo lu'ne emaa' nouve minive

<sup>22</sup> ne'mo leli' gamazi nene lo-lengemo muludingu' do lamine' ilive lo imiselekuvo lengita nesene novive.

<sup>23</sup> O'moso metehosi ido' Guvelesi ve Izesu' Kilisitokisi ingine hongu lo minaa' monovo nene neze zuho lengita di soto' i-lingidi ido' lingine engikumu' gili ele'vole' ado' nene imine' mili lutine ge neme ne geme li minilizani' amuzo nesi nene di soto' i-lingidilisiho.

<sup>24</sup> Ido' lingine Guvetesi ve Izesu' Kilisitoda gi'mize lamine' igi lutine mudise ele'vole' igi imaa' ani' aleve mukita nene O'moso'mi nasahili' ne'mo mine molo minivo.

Moda ve.

**MONO' GODOLO GOSOHO'**  
**The New Testament in the Dano (Upper Asaro)**  
**language of Papua New Guinea**  
**Nupela Testamen long tokples Dano (Upper Asaro)**  
**long Niugini**

copyright © 1989 Wycliffe Bible Translators, Inc.

Language: Dano

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

---

PDF generated using Haiola and XeLaTeX on 18 Apr 2025 from source files dated 31 Aug 2023

76c78bc1-63e6-5f61-a363-169051cfe72e